



Revisiun parziala dalla planisaziun locala

Plan general d'avertura Recal

M E S S A D I

dalla supraponza communal al cussegl da vischnaunca

Preziau signur president
Stimadas cusseglieras
Preziai cussegliers

1. Introducziun

La Recal SA ei ina corporaziun da calira ella vischnaunca da Mustér che less utilisar la lenna da brisch ord la regiun per producir central energia en fuorma da calira e reparter quella en ina reit. Plinavon ei la Recal SA in impurtont patrun da lavur cun numerusas plazzas da lavur e cun in'aula valurisaziun per nossa regiun. Il num «Recal» stat per «calira regenerabla».

Il november 2009 eran differentas sanaziuns da scaldaments planisadas el center dil vitg e la realisaziun dalla «Sennaria Surselva» steva avon porta. Suenter examinaziuns extensivas ed evaluaziuns da systems da scaldaments ei vegniu deciduu da crear ina corporaziun da calira. A Rieven, sin la parcella 3626, ei vegniu construuiu ina centrala da scaldament ed adina dapli interessents per l'energia nova ein vegni colligiai cun la reit (Spar, casa da scola, casa da tgira Puntreis, casa communal, banca Raiffeisen, hotel Cucagna, Claustra Mustér, Center Fontauna, Disentiserhof). Era objects da habitar en possess privat ed ulteriurs objects da commerci ein vegni colligiai cun la reit. Igl onn 2024 ei vegniu construuiu ina secunda centrala da calira a Prau (parcella 3991) per saver engrondir la reit da calira entochen Acletta, Cuoz, Peisel, e Pignola.

2. Motiv per ina revisiun parziala

Per saver colligiar ils territoris dad Acletta, Cuoz, Peisel, e Pignola cun la reit da calira eis ei necessari da construir novas lingias sutterranas. El territori dad Acletta sa il decuors dallas lingias vegnir coordinaus cul project «Ovra Solara Magriel», aschia ch'ei basegna sulettamein in foss per omisdus projects. Damai ch'ina gronda part dallas lingias novas sesanfla ordeifer la zona da baghegiar, basegnan quellas ina lubientscha da baghegiar per implonts ordeifer la zona da baghegiar (BAB). Sco basa per la lubientscha eis ei necessari da purtar en las lingias novas el plan general d'avertura.

Ulteriuramein ei planisau la construcziun d'in implont solar sin iniziativa privata sin la parcella 1225 a Cuoz, che duess medemamein vegnir colligiaus cun la reit da lingias. La midada da zona per quella parcella fa part dalla revisiun totala dalla planisaziun locala, che vegn tractada ils 25 d'uost ed ils 10 da settember el cussegl da vischnaunca. Il plan general d'avertura fa denton buca part da quella revisiun totala, aschia che quella fatschenta fa part all'actuala revisiun parziala.

3. Revisiun parziala dil plan general d'avertura 1:2'000 Recal

Per saver ademplir las pretensiuns da planisaziun per igl engrondiment dalla reit da calira e per igl implont solar a Cuoz eis ei da definir suandontas mesiras da planisaziun el plan general d'avertura Recal:

- Novas lingias dalla reit da calira (planisau)
- Lingias gia existentas dalla reit da calira ella cumpart dil plan general d'avertura Recal
- Staziuns da trafo existentas e sutstaziun (Unterwerk) existent
- Las lingias da forza electrica da 16kV existentas e novas
- Per motivs d'orientaziun vegn era integrau el plan la nova lingia da forza electrica che vegn construida en connex cun il project «Ovra Solara Magriel»

4. Ponderaziuns finalas

Il svilup dalla reit da calira porscha in provediment d'energia regenerabla adattau per il futur e neutral arisguard il CO₂. Grazia alla secunda centrala da calira a Prau sa la reit vegnir rinforzada ed engrondida considerablamein. Cun las novas lingias planisadas san interessents pli gronds (fatschentas eav.) vegnir colligiai ed el medem mument han proprietaris privats la pusseivladad da profitar da quella energia cun secolligiar vid la reit.

5. Proposta

Sin fundament dallas ponderaziun suramenziunadas

p r o p o n a

la suprastonza communal al cussegl da vischnaunca:

1. d'approbar la revisiun parziala dalla planisaziun locala concernent il plan general d'avertura 1:2'000 Recal.

En num dalla suprastonza communal

Il president:

Il meinafatschenta:



René Epp



Roland Cajacob

Disentis/Mustér, ils 4 d'uost 2025

Annexa:

- Plan general d'avertura Recal 1:2000
- Rapport da planisaziun revisiun parziala Recal